

PM janji terus bela rakyat pendapatan rendah
Malaysiakini.com
June 10, 2010
Puteri Aida Haryani

Kerajaan bertekad untuk terus membela golongan berpendapatan rendah melalui pelaksanaan Rancangan Malaysia Kesepuluh (RMK10), kata Perdana Menteri Datuk Seri Najib Razak.

Najib berkata sasaran itu akan memberi manfaat kepada kumpulan isi rumah berpendapatan 40 peratus terendah di mana Bumiputera merupakan golongan terbesar - 73 peratus daripada 2.4 juta isi rumah dalam kumpulan ini.

"Pendekatan ini akan menjamin keadilan sosial kepada golongan yang benar-benar memerlukan bantuan dan tidak akan ada sesiapa pun yang berasa terpinggir," kata Najib ketika membentangkan RMK10 di Dewan Rakyat hari ini.

Beliau turut memberi jaminan, golongan berpendapatan rendah akan terus diberi bantuan untuk mengurangkan kesan pengurangan subsidi ke atas kos sara hidup mereka.

"Fokus khusus akan diberi kepada golongan terpinggir yang tinggal di kawasan pedalaman, terutamanya yang mendiami di rumah panjang di Sabah dan Sarawak, serta Orang Asli dan pekerja di estet di Semenanjung Malaysia.

"Masih terdapat mereka yang hidup tanpa bekalan elektrik dan air, dan jauh daripada kemudahan kesihatan.

"Anak-anak bersekolah terpaksa berjalan jauh, merentasi jalan yang kadang kala berdebu atau lecah berlumpur dan terdapat juga antara mereka terpaksa merentas sungai untuk menimba ilmu di sekolah.

"Kerajaan akan membela mereka yang kurang bernasib baik ini untuk keluar daripada cengkaman kemiskinan.

Katanya lagi, kerajaan akan mempergiatkan pelaksanaan program ekonomi dan penyediaan kemudahan asas untuk manfaat golongan berkenaan.

"Kerajaan juga sedang mempertimbangkan kaedah untuk memberi hak milik tanah kepada masyarakat Orang Asli dan Bumiputera di Sabah dan Sarawak.

"Ini akan membolehkan mereka mendapat manfaat daripada program pembangunan pertanian secara bersepadu menggunakan pendekatan agropolitan dan contract farming.

"Mereka juga akan diberi akses yang lebih baik kepada infrastruktur dan kemudahan awam seperti jalan, pendidikan dan latihan kemahiran," katanya.

Menurut Najib lagi, tumpuan juga akan diberi untuk memperbaiki kualiti hidup pekerja ladang dan estet yang tersesar.

Jelasnya, sebanyak 182 buah estet akan disalurkan bekalan air dengan peruntukan sebanyak RM109 juta, manakala program latihan kemahiran akan disediakan bagi golongan muda pelbagai kaum yang tercicir daripada persekolahan.

Warga ini juga akan dibekalkan kemudahan perniagaan melalui skim kredit mikro Amanah Ikhtiar Malaysia (AIM) dan Tabung Ekonomi Kumpulan Usaha Niaga (TEKUN).

Selain itu, latihan akan diberikan kepada golongan ini melalui Institut Keusahawanan Negara (INSKEN), Pusat Giat Mara dan Institut Kemajuan Desa (INFRA).

Seramai 280,000 penduduk kampung baru Cina juga akan diberi bantuan melalui skim pinjaman mudah untuk membayar premium tanah bagi perlanjutan tempoh pajakan.

"Untuk ini, sebagai permulaan dana pembiayaan sebanyak RM100 juta akan disediakan," katanya lagi.

Melalui RMK10 juga, kerajaan akan membina 78,000 rumah mampu milik bagi setiap segmen masyarakat, terutamanya golongan berpendapatan rendah.

"Undang-undang berkaitan akan diketatkan dan penguatkuasaan ditingkatkan ke arah memastikan rumah mampu milik dibina dengan kualiti yang sewajarnya.

"Satu dana berjumlah RM500 juta akan diperuntukkan bagi tujuan membiayai kerja-kerja baikpulih dan penyelenggaraan rumah mampu milik awam mahupun swasta.

"Dana ini didasarkan kepada kaedah geran sepadan, di mana separuh daripada kos akan disumbang oleh kerajaan, manakala separuh lagi oleh pihak pengurusan atau persatuan penduduk rumah berkenaan," katanya.

Copyright © 1999-2007 Mkini Dotcom Sdn. Bhd.

Source : <http://www.malaysiakini.com/news/134203>